

## La'ó Hamutuk


Institutu Timor-Leste ba Monitor no Analiza Desenvolvimentu

I/1a Rua Mozambique, Farol, Dili, Timor-Leste

Tel: +670 332 5013

email: [info@laohamutuk.org](mailto:info@laohamutuk.org)

Website: [www.laohamutuk.org](http://www.laohamutuk.org)



2 Julhu 2010

Komunikadu imprensa:

### **SAI DEIT NASAUN KUMPRIDOR EITI, SEIDAUK ASEGURA BENEFISIU PETROLEU BA TIMOR-LESTE**

Hafoin deklarasi husi Sekretariadu Internasional EITI nian iha Oslo-Noruega katak Timor-Leste sai nasaun kumpridor EITI nian ba datuluk nian iha loron 1 Julhu 2010, La'ó Hamutuk fo apresiasaun ida ne'ebe bo'ot ba esforsu estadu Timor-Leste nian, ne'ebe hahu'u kedan iha 2003 too ohin loron hodi kumpri no garantia transparansia iha jestaun petroleu nian iha Timor-Leste.

Maibe, ami hakarak nafatin hato'o katak ho transparansia deit labele asegura benefisiu petroleu nian ba povo rai ida ne'e nian. Estadu Timor-Leste, liu-liu Governu, Parlamentu, Kompania Mina-rai, Sociedade Sivil no orgaun soberania sira seluk atu labele kontente no sente iha vitoria, tamba deit sai membru ka kumpridor EITI nian iha reziaun ida ne'e, maibe estadu ida ne'e tenke iha mos politika jestaun ida ba alokasuan reseita petroleu nian ida ne'ebe prudente, ho kuidadu no sustentavel atu benefisia jersaun Timor-Leste nian ohin loron nian no aban bain-rua nian.

Aktualmente, Timor-Leste nia dependensia ba reseita petroleu nian, maka'as teb-tebes iha mundu, kompara ho nasaun sira seluk iha rejiaun ida ne'e. Ita nia rendimentu estadu tinan-tinan 97% depende ba reseitas petroleu. Por ezemplu, daudaun ne'e, governu hakarak atu foti osan ba Orsamentu Jeral Estadu 2010 no Rektifikasuan nian ho montante tokon \$811 husi Fundu Petroleu, montante ida ne'ebe liu ona kalkulasuan nivel Rendimentu Sustentavel Estimadu (RSE 3%) hanesan Lei Fundu Petroleu nian hateten.

Karik Estadu ida ne'e, liu-liu Governu no Parlamentu aprova no aloka osan Fundu Petroleu nian ba deit seitor sira ne'ebe la produtivu, hodi la fo vantajem atu dezenvolve seitor naun-petroleu nian no hamoris ekonomia povo sira iha area rurais, Timor-Leste sei hetan "**derrota**" ida ne'ebe boot no la kotu, wainhira ita nia reseita mina-rai nia menus no mina-rai iha Timor-Leste maran tiha.

Vantajem boot liu ba Timor-Leste nian mak, estadu tenke kumpri rekerimentu legal husi EITI, Lei Fundu Petroleu nian, Lei Orsamentu Jestaun Finanseiru nian, ne'ebe garante katak reseita husi rekursu petroleu nian tenke uza ba iha interese povo Timor-Leste tempu naruk nian hodi asegura benefisiu jersaun ohin-loron nian no aban-bain-rua nian, hodi evita malisan rekursu ba Timor-Leste.

Ikus liu, ami rekomenda ba estadu Timor-Leste, atu uza modelu transparansia iha seitor petroleu nian, hodi sai mata-dalan ba transparansia iha seitor sira hanesan iha aprovizionamentu estadu nian, ajensia outonomus nian no sira seluk tan, liu-liu, iha sira nia relatoriu ba gastus no reseitas nian.

La'ó Hamutuk nudar organizasaun naun govermental ida ne'ebe halo monitorizasaun no fo análise ba prosesu dezenvolvimentu Timor-Leste nian ho hanoin atu evita malisan rekursu, luta ba justisa ekonomia-sosial, promove soberania aihan agrikultura, igualidade, justisa, boa-governasaun no nasaun ne'ebe demokratiku. No La'ó Hamutuk disemina informasaun sira ne'e liu husi *Buletin*, Programa Radio, Enkontru Publiku no website.